



TERORIZAM

Tužilaštvo BiH i SIPA počeli istragu zločina u kojem su ubijeni dvojica vojnika

Policijska istraga otkrila da je Enes Omeragić bio povezan sa Muhamedom Mecom, uhapšenim u akciji protiv grupe osumnjičene za terorizam koju je predvodio Rijad Rustempašić. Ministar sigurnosti BiH potvrdio: Omeragić je u svom ličnom dnevniku veličao ISIL



FOTO: KEMAL SOFTIC

PIŠU BERINA PEKMEZOVIĆ
ALMIR ŠEČKANOVIĆ

Tužilaštvo Bosne i Hercegovine okvalifikovalo je ubistvo dvojice vojnika OS BiH i ranjavanje jednog kao krivično djelo terorizam. Tužiocima se nisu dvoumili: napad na Oružane snage je napad na državu Bosnu i Hercegovinu.

SIPA kucala na vrata

Istraga svirepog zločina koji se dogodio u srijedu navečer u sarajevskom naselju Rajlovac, stotinjak metara od ulaza u kasarnu Oružanih snaga, trajala je i tokom jučerašnjeg dana. Državna agencija za istrage i zaštitu (SIPA), u saradnji sa kantonalnim i federalnim MUP-ovima, analizirala je motive koji su naveli Enesa Omeragića da ubije vojnika Armina Salkića (26) iz Viteza i ka-

plara Nedeljka Radića (34) iz Nevesinja, te rani njihovog kolegu Dževada Ljukovca iz Sarajeva.

- Tužilaštvo BiH preuzelo je istragu oko ubistva pripadnika Oružanih snaga BiH. Tužilaštvo BiH će zajedno sa partnerskim sigurnosnim agencijama uložiti

maksimalne napore u potpunom rasvjetljavanju ovog kaznenog djela – saopćio je portarol ove institucije Boris Grubešić, navodeći u svojim izjavama apel za povećanjem broja tužilaca koji mogu raditi na rasvjetljenju krivičnih djela terorizma.

Nezvanično saznajemo da će na rasvjetljenju ovog krivičnog djela raditi više tužilaca Tužilaštva Bosne i Hercegovine. Pod posebnom je lupom motiv napada na vojnike, s obzirom da se tokom prethodna dva dana ubica Omeragić tretirao kao narkoman i sitni kriminalac, koji je,

u posljednjih nekoliko mjeseci, postao blizak osobama iz takozvanog vehabijskog pokreta. Već jučer su agenti SIPA-e na saslušanje priveli Omeragićevog zeta Muhameda Mecu. On je poznat kao pripadnik grupe osumnjičene za terorizam koju je predvodio Rijad Rustempašić, a sa kojim je uhapšen u martu 2008. godine. Mecu je nakon tri mjeseca provedena u istražnom pritvoru pušten na slobodu. Njegov mentor Rustempašić je zbog terorizma na Sudu Bosne i Hercegovine osuđen na četiri godine zatvora, a nakon odslužene kazne pušten je na slobodu.

Policija je za motivima napada tragala i u naselju Sokolje, koje je jučer tokom dana bilo u svojevrsnoj blokadi. Na informativne razgovore je privedeno nekoliko komšija i članova Omeragićeve porodice. Potvrđeno je da se sa njima razgovara u svojstvu svje-

doka. Ekipe Faktora razgovarala je sa nekoliko stanovnika Sokolja, kojima su agenti SIPA-e jučer pokucali na vrata.

-Nekoliko policajaca iz SIPA-e su došli pred moju kuću. Pokazali su mi sliku Enesa Omeragića, a potom su me pitali da li znam tog čovjeka. Rekao sam da ga znam, ali samo iz viđenja. Onda su me pitali da li znam da je bio narkoman. Nisam mogao potvrditi. A onda su me pitali da li je bio pripadnik selefijskog pokreta - kazao nam je jedan od stanovnika naselja Sokolje, koji je zamolio da mu ne pominjemo ime, navodeći na kraju da su inspektori SIPA-e najavili svoj ponovni dolazak u Sokolje.

Ono što su inspektori pronašli u Sokolju javnosti je prezentovao državni ministar sigurnosti Dragan Mektić na jučer održanoj vanrednoj konferenciji za medije u prostorijama Vijeća

Page: 2

Reach: 0

Country: BOSNIA AND HERZEGOVINA

Size: 982 cm2

2 / 2

ministara BiH. Ministar je prvo napravio kratku rekonstrukciju događaja od srijede navečer, a onda je otkrio detalje istrage.

Informacije u Parizu

-Policija je u njegovoj kući pronašla određene zabilješke koje je on vodio i u kojima je veličao IDIL. Smatramo da se on spremao za ovaj čin. Sve upućuje na to da je na Omeragića utjecao njegov zet Meo – pojasnio je ministar Mektić.

Prema njegovim riječima, dosadašnji tok istrage je pokazao da je Omeragić ovaj napad izveo smišljeno. Izašao je iz kuće sa automatskom puškom i nekoliko bombi. Već pred kućom je ispalio jedan kratki

Nakon izlaska iz kladionice ugledao je vojnika kako ulazi u autobus i zbog toga je počeo pucati po vozilu. Zahvaljujući tome što je vozač ugasio svjetlo u autobusu izbjegnute su žrtve

rafal iz puške. Po dolasku u kladionicu, u kojoj je, osim

ubijenih vojnika bilo i nekoliko civila, uputio se pravo prema pripadnicima Oružanih snaga BiH, ne obraćajući pažnju na ostale prisutne, i pucao u njih.

Nakon izlaska iz kladionice ugledao je vojnika kako ulazi u autobus i zbog toga je počeo pucati po vozilu. Zahvaljujući tome što je vozač ugasio svjetlo u autobusu, a putnici legli na pod, izbjegnute su veće žrtve ovog napada. Poslije toga se, dodao je Mektić, Omeragić vratio kući, gdje se ubio.

Ministar Mektić je naglasio da će sve informacije o ovom terorističkom napadu biti prosljeđene i policijskim agencijama Francuske, s obzirom da je ubica rođen u glavnom gradu te zemlje, a napad se desio svega nekoliko dana nakon serije terorističkih napada u Parizu. Napomenuto je da za sada ne postoji veza dva slučaja, ali da sve informacije vrijedi provjeriti.

Mektić: Moramo uništiti terorizam!

-Ovo je događaj koji je prevršio mjeru. Mi se ne smijemo naučiti da živimo s terorizmom, nego ga moramo uništiti. Moramo poduzeti sve mjere koje će sprečavati dalju radikalizaciju i ekstremizam. Moramo raditi i na utvrđivanju motiva tih ljudi za takvo ponašanje. Osim toga, kako nam se može dogoditi da u BiH postoje izolovane zajednice koje ne priznaju ustavni poredak ove zemlje. Takve zajednice, poput Maoče, se na sve načine moraju primorati da poštuju Ustav i zakone ove države, a ako ne može ni na koji drugi način, onda i silom – izjavio je ministar sigurnosti BiH Dragan Mektić, navodeći i druge probleme koji tište bosanskohercegovačku sigurnost.

- Neposredno nakon napada pojedini policijski zvaničnici su iznosili kvalifikacije da se radi o terorizmu, iako istraga nije ni započela kako treba. Osim toga, kako se moglo dogoditi da se ne zna ko vodi istragu, odnosno državni tužilac je tražio da se slučaj tretira kao teroristički napad, a kantonalna tužiteljica

kao obično ubistvo. Policijske agencije su se „otimale“ međusobno oko toga ko će voditi istragu. Zbog toga ćemo tražiti da se doneše zakon o borbi protiv terorizma, kako bi se izbjegle ovakve mučne situacije, odnosno da se da ovlaštenje državnim tužiocima da mogu, ako to budu smatrali potrebnim, preuzeti istragu u bilo kom slučaju za kojeg postoje indicije da se radi o terorizmu i da u tim slučajevima uviđaj obavljaju pripadnici SI-PA-e - pojasnio je ministar Mektić.

